

Ba biografia badak ba Ministru Gusmão

Sua Eselênsia Kay Rala Xanana Gusmão mak eis-Prezidente Repúblika, eis-Primeiru-Ministru no agora dadaun hanesan Ministru ba Planeamentu no Investimentu iha Governu Timor-Leste nian. Sua Eselênsia mos agora dadaun kaer kargu hanesan Ministru Mentor no nia mak Xefi Negosiador ba negosiasaun ba Timor-Leste nia fronteira marítima ho Indonézia no Austrália.



Hafoin Lider ba Rezistênsia, Nicolau Lobato mate tiha iha Dezembru 1978, Ministru Gusmão mak organiza no lidera fali luta ba independênsia ne'e durante tinan 24 nia laran. Sua Eselênsia sai hanesan Lider ba Rezistênsia iha 1981 no Xefi-Komandante ba Forsas Armadas ba Libertasaun Nasional Timor-Leste (FALINTIL). Ema kaer Ministru Gusmão iha 20 Novembru 1992 no durante tinan hitu tuir mai ne'e nia hela iha kumarka Indonézia nian ida. Nia hetan libertasaun iha Setembru 1999.

Restaura tiha independênsia, Sua Eselênsia halao nia knar hanesan Prezidente ba dahuluk ba nasaun foun Timor-Leste husi Abril 2002 to'o Maiu 2007, no sai hanesan Primeiru-Ministru husi Agustu 2007. Ministru Gusmão ho nia hakarak rasik hodi estabelese fila fali relasaun entre Timor-Leste ho Indonézia. Hodi nune'e, nia ajuda atinji nível rekonsiliaun ida entre nasaun rua ne'ebé se lae karik sei esperiênsia instabilidade.

Ministru Gusmão mos ho nia hakarak rasik tuun husi nia kargu hanesan Primeiru-Ministru iha Feveireiru 2015 hodi fó oportunidade ba líder sira jersaun foun, atu kontinua harii nasaun ne'e. Tranzisaun ne'e buat ida ne'ebé nunka akontese iha tempu modernu, pós-kolonial, istória polítika no hatudu buat ne'ebé la hanesan ho saida mak akontese bebeik katak líder sira husi nasaun hirak ne'ebé foin harii hakarak kaer metin poder polítiku ba tempu naruk.

Sua Eselênsia simu ona prémiu barak no louva husi governu no organizasaun sira iha mundu tomak, inklui 'Doutor *honoris causa*' husi universidade sira iha Austrália, Portugal, Brazil, Japaun no Malázia (foin lalais ne'e iha Dezembru 2015, Ministru Gusmão hetan prémiu 'Doctorate of Letters, *honoris causa*', husi Universidade Melbourne, Austrália). Husi Sua Eselênsia nia prémiu importante hirak ne'e mak Indonézia nia medalla onra ne'ebé aas liu, ida ne'ebé Indonézia entrega ba nia iha 2014 no mos 'Honorary Knighthood of the Grand Cross of the Order of St Michael and St George' ne'ebé Sua Majestade Liurai Feto Elizabeth II mak fó iha 2003.